



Con motivo da celebración do bicentenario do nacemento de Louis Braille

A ONCE entrega a Pilar Rojo un exemplar en braille da Convención da ONU sobre os dereitos das persoas con discapacidade

- **Impúlsase así a utilización deste sistema de lectoescritura e o recoñecemento dos dereitos de persoas con discapacidade**

Santiago, 27 de novembro de 2009.- A ONCE entregoulle esta mañá á presidenta do Parlamento de Galicia, Pilar Rojo, un exemplar da Convención da ONU sobre os dereitos das persoas con discapacidade, editado en braille. O delegado territorial da ONCE en Galicia, Eugenio Ferradás, fixo entrega deste documento nun acto que tivo lugar no pazo do Hórreo, sede da Cámara galega.

Esta iniciativa enmárcase dentro dos actos que durante 2009 a ONCE realiza con motivo do 200 aniversario do nacemento de Louis Braille, inventor do sistema de lectoescritura que, baseado na combinación de seis puntos en relevo, revolucionou a vida de millóns de persoas cegas, ás que sacou da prehistoria en pleno século XIX e as situou ás portas da era do coñecemento e da sociedade da información.

A ONCE pretende que este texto en braille forme parte dos documentos esenciais do Parlamento de Galicia e doutros organismos, de xeito que se consolide como un elemento máis de normalización das persoas con discapacidade no acceso á

información, á cultura e á vida cotiá e, neste caso, se engada aos textos que velan polo cumprimento dos seus dereitos.

A Convención da ONU sobre os dereitos das persoas con discapacidade entrou en vigor o 3 de maio de 2008 e obriga aos países que a ratifican, entre os que España foi dos primeiros, a recoñecer que todas as persoas son iguais ante a lei, a prohibir a discriminación baseada nas discapacidades e a garantir igual protección da norma para todos. Os países que se suman á Convención comprométense a elaborar e poñer en práctica políticas, leis e medidas administrativas para asegurar os dereitos recoñecidos no documento e abolir as leis, regulamentos, costumes e prácticas que constitúen discriminación.

A importancia do braille

A ONCE impulsa o uso do braille en todos os ámbitos, coa finalidade de que as persoas cegas acaden maiores cotas de autonomía persoal. O etiquetado de produtos farmacéuticos, de alimentación ou de limpeza, a sinalización de ascensores, a publicación de folletos de información ou de catálogos de museos, aínda que semellan pequenos pasos cara á normalización, fan máis doada a vida das persoas cegas.

O braille, ademais de ser un sistema de lectoescritura imprescindible na educación dos 7.500 nenos e rapaces españois, é unha das portas que os introduce nas novas tecnoloxías e na sociedade da información. Por isto, a través da Comisión Braille Española, a ONCE traballa para adaptar este sistema de lectoescritura ás novas necesidades da sociedade da información, o que lles abriu múltiples posibilidades laborais, de educación ou de ocio. Un exemplo son as "liñas braille", un teclado periférico que transforma en braille a información contida na pantalla, que é clave para o seu uso por persoas cegas e, moi especialmente, por persoas xordocegas.

A ONCE, unha das produtoras de braille máis importantes do mundo

A ONCE pon á disposición dos seus afiliados máis de 57.000 títulos en braille aos que agora tamén poden acceder a través da Internet na páxina www.once.es. Ademais, presta apoio aos estudantes para a impresión de apuntes e outros textos, de xeito que máis dunha trintena de unidades periféricas imprimen en braille por toda España. Nos procesos de edición e impresión empréganse medios electrónicos e informáticos, escáneres, recoñecedoras ópticas de caracteres, impresoras braille, etc.

España é líder mundial en produción de impresoras braille, a través do Centro de Investigación e Desenvolvemento de Aplicacións Tiflotécnicas (CIDAT) da ONCE, que exporta impresoras para o uso dos cegos de todo o mundo. Ademais, dóanse unidades completas a compañeiros cegos que viven en países en desenvolvemento para que poidan contar con puntos de acceso á información e ao coñecemento.

Saúdos, Gabinete de Comunicación do Parlamento de Galicia